



小 詩

集 禪

陀

盦





己未四月大令五君招沈子校文獻甫識之於東莞庚申四月公子筱泉刊沈子意集獻甫序之於羊城泣然曰此沈子伯眉詩鈔也然而沈子伯眉則死矣嗚呼君嘗有楞華室詞鈔已付梓又有倪雲林年譜亦脫藁惟其詩遠仿孫南園而稍斂之近仿陳元孝而稍縱之爲同時張南山高弟雖蹤跡幾處不出里中窮愁半生獨游人外而交必一時之雋文兼六代之華虞公秘書尤習南史嚴羽禪學並通西竺如騏驥之行過都厯塊而不能崖其所至也如鴻鵠之舉翔雲翮風而不能測其所之也乃孔雀方張自顧其尾春蠶未臥遽翦其絲文人如王子安詩人如李長吉修文天上古有例矣埋憂地下今無憾焉獻甫長君者二十餘年識君者二十餘日筱泉故從余游亦新與君洽獨爲終始其事白雲杳然蒼波無極此亦君生時所不料也獻甫論詩與君同而作詩與君異遺集有檀弓樂府十首和方九谷舊邊八首和義山古蹟六首課試白桃花四首續出咏夕陽四首稍乖本色刪之不錄其餘則未嘗定一字是爲序象

州鄭獻甫

憶道光癸卯春詞林花田共結詞社始晤伯眉沈君交  
豈忘年材原名世寄愁與月刻意傷春鎮日嘔心仍愛  
錦囊之貯畢生低首甯徒寶劍之篇微雲疎雨之章聯  
吟激賞野火春風之什行卷交推耿介壹鬱楚人之意  
實傷磊落抑塞王郎之才誰拔郎中三影平子四愁生  
平實類鄒陽精采頗同宋玉迨咸豐甲寅冬疊鼓厭聞  
高軒忽過似劉琨之傷亂謂鍾期之賞音出祇陀菴集  
特命序焉好人譏彈使僕潤飾病同吳質懶甚嵇康元  
晏著論竊愧太冲之賦君苗焚硯綠見士衡之文遷延  
因循曾未屬藁遂乃論園陳局開逕款門拜倪高士之

小祇陀鹽詩鈔

一

生辰作吳清翁之舊社山堂讀史講院稱詩住嶺海而  
憂生詣高涼而錄別以至滄海橫流蕪城共賦家家賃  
廡各各移居沈下賢屢夢小苒李博士曾逢豪客訪羅  
含之廢圃蘭菊叢生謁坡老之遺臺松篁無恙小山桂  
樹隨地畱人潭水桃花伊誰送汝合稱才子賀季真醉  
擲金龜癖譽嬌兒王僧綽能堆蠟鳳調小兒  
懋安管幼安藜

牀可坐白帽條然杜子美草堂未營春衣日典各賣珠  
而易米仍裁帖以乞花問校石與讐方話標燈而環炭  
晨星落落今雨涔涔愴絕昔游宛然隔世虎嘯風生珠  
傷月死獻歲已懸縛帳兼旬乃造版門椒花之頌不聞



柏葉之觴誰酌雷霆未作霜雪載零芙蓉之鏡匣無光  
昔宿之盤殮曾飮三生杜牧坐禪榻而溘然三絕鄭虔  
辦青氈而竟天記法華之在手殉堯典以同棺玉樹長  
埋金茎有集嗚呼痛哉猶憶端居多暇竟夕聽詩謂愁  
苦之易工以悲哀而爲主酷如亡友

謂徐君夢  
秋文學

業作古

人絕憐騷屑之音大有蒼涼之感宜焚綺語永保遐齡  
詎料狂言竟猶古讖嗟嗟少時常恐難踰知命之年微  
疾可痊遽赴脩文之職宿草將列春蘭易萎泉壤旣邈  
若山河星霜殆倏如露電愴懷逝者太息斯人孔少府  
之遺著漸湮馬文園之叢稿誰覓夙詡後來王粲罕逢

小祇陀盒詩鈔

二

當代桓譚存詩若干卷彼泉王君特校刊焉原君耐久  
交也間沿宋格實具唐音殆衍派於曲紅仍導源於太  
白振奇儷乎石鼎二櫛豔等於梅村霜辛露酸風恬月  
淡元裕之得幽并之閒氣并冕中州高季迪還初盛之  
舊觀鍼砭北地例以國初諸老殆宋荔裳查初白之

繼聲律以嶺外詞人亦孫西庵黎瑤石之嗣響洵可傳  
矣風流頓盡梗概猶存醴陵之錦段如新謝傳之碎金  
無泯祝旂常兮再世託鉛槧以千春琴宛聽兮雍門笙  
倘吹於緱嶺知梁伯鸞之穿冢葬近要離卹任彥升之  
遺孤論煩劉峻僅玉杯而問世似錦瑟之擅場遺書滿

楹宜續蘭臺之史懸劍空壘宛報秣陵之牋南海譚瑩

小祇陀盒詩鈔

三



嗚呼詩人之窮如沈君伯眉者豈不哀哉伯眉少而善病輾轉七八年瀕死者數矣病中煩冤怫鬱則逃於禪以自寬病起捐納校官久不得選家計日蹙出而謀食連值兵燹奔避勞窘兵事稍解選韶州訓導未赴任而死矣斯所謂詩能窮人者耶當夷寇之破省城也余遷居橫沙村伯眉遷居西關猶爲詩寄余余喪子慟而病瘡伯眉來弔搖其手曰無可言余病起而伯眉死余往哭之曰伯眉今真所謂無可言者也其子哭於側余問伯眉詩稿曰在篋中嗚呼伯眉學禪者也身非我有而况詩耶顧其詩之工不可不存王君篠泉刻之而屬余題辭余何以題伯眉哉追感往事涕淚橫集無可言而已矣悲夫同治二年正月陳澧題

大雅淪亡日胡為失此人窮官仗全福冷署老閒身交  
誼彌思舊才華殆絕倫亂離無涕淚緣汝慟霑巾

寸心知得失千古定誰傳李嶠真才子王恭尚少年扶  
輪須健者按戟到諸賢不謂哀鴻似偏教賦鵬先

西園寓公暫北郭故交非白杜鵑仍放亡友顏君猷孝廉以白杜鵑花

詩得各余嘗謂君才筆似之亦早逝黃胡蝶亂飛盛名同石帚晚况學蒲

衣王玉宇瓊樓在何知隕少微

生才原不易瑣屑問生終香界耽禪悅騷壇痛鬼雄蕭  
條天地慣搖落古今同數冊祇陀集錢郎逮放翁

小祇陀盒詩鈔

五

山陰 汪 琰 英生

不遣斯人死清寒已可哀儒官纔首蓓營魄遽蒿萊傳  
世期文苑論交憶酒杯祇陀菴畔路綠黯半弓苔

幾卷遺詩在悲涼語最工何人呼島佛此事逼涪翁身

世干戈際文章涕淚中傷心無限感應不為途窮

風義論千古朋交得一人平生感風雨遺稿出灰塵剖

璞青峯裂求珠赤水真名山傳姓氏不假泐貞珉小泉為刊

遺集

吾友梁溪子謂杜季英新詩亦擅揚才人同但化客感極蒼

茫玉樹春無色瑤華夜有霜修文相見日勿復嗜篇章



幾卷祇陀集重看一惘然故人從此逝遺恨倩誰傳寄  
託言尤隱踈狂意自憐鬢絲禪榻畔淒絕杜樊川

縱有嶽奇氣其如志未伸羣兒猶撼樹大雅爲扶輪

小谷

師爲論定當行世才多轉累身玉樓會有例應亦召斯

人

近日騷壇客逢君欲受降粗豪輕北地奇峭出西江禪

悅山栖志詞工水調腔難忘共尊酒相對話燈窗

檢點多新作蒼茫感舊游叢殘都一集篋衍付千秋痛

哭唐衢淚高歌杜甫愁平生心事畢幸不付東流

小祇陀盒詩鈔卷一

番禺 沈世良

讀楊升菴滇載記擬小樂府十四首


夷風變諸葛賜姓永興年銀簪叩銅鼓歲祀白崖川  
鬼哭松明火兵屯龍尾關內屏張賜樂新破吐蕃還  
子弟梨園散中原戰鼓喧笛工饒白髮絕徼話開元  
金葉通降表中朝作館甥瘴花開易落愁煞鄭清平  
竟危唐社稷岳瀆關殊方勛業思章李殘碑臥夕陽  
避位成風俗披緇劔作僧寺門藏骨塔一半是王陵  
斧畫巖中外巖疆靜鼓聲始知函谷塞不用一丸泥

小祇陀盒詩鈔卷一

百戰爲秦贅紅巾破賊圍玉臺工製曲饒唱繡弓衣  
孔雀私藏膽鴛鴦舊侶非愧渠蘇蕙錦苦語寄當歸  
青天不解語常似阿奴心龍山共命鳥銜石變窈窕  
月照功東寺花開押不盧可憐路裏彩薄命誤羅敷  
大節輝先後高楊異代同可無點蒼石染筆紀幽宮  
珊瑚勾我出麗譯白狼詩慷慨僧奴語雄風滿繡旗  
絕域開金齒詞人祀碧雞傷心嚴譴日更在夜郎西

綠陰

種樹書成樂澗阿閉門池館老煙蘿古槐夢曲通胡蝶  
喬木年高過橐駝青瑣日長天似幕碧城人定月如螺





濛濛一片傷心色誰識湖州舊恨多

高樓暝色赴窓紗如霧如潮面面遮  
梅子尚酸蠶結局柳絲將盡燕成家  
樓亭一笠圓臨水杉屋三間老種瓜  
莫放亂蟬聲似雨嫩涼呼枕讀南華

酒旗風軟閣斜暉門巷愔愔白板扉  
種紙菴荒僧去久眠琴地僻客來稀  
偶逢么鳳收香到略見陽烏貼樹飛  
便覺眼前添畫本晚霞紅上釣人衣

說瀑眠雲位置宜兩行新長亞門枝  
涼生葛幙移牀近濃遞茶煙出樹遲  
松頂雪消楊子宅田頭花落葛仙祠  
舊游莫道春歸盡剛是年華慘綠時

小祇陀龕詩鈔卷一

二

天文十詠和張南山先生

日

朝騰羲馭絳霄圓夜抱迴瀾浴紫淵  
五色賦成聲擲地一枝筆健畫從天  
封章早擅黃童對草澤將過正禮年  
放眼齊州煙九點玉煙多處是藍田

月

花影如潮上曲欄欄邊人去羽衣單  
天心圓缺參來熟清氣乾坤畫出難  
眼底山河空有影夢中樓閣不知寒  
秋宵一把蟾蜍淚灑作珍珠曉未乾

星

一枰碁勢落江湖望裏雲藍貼水鋪早見光芒通帝座  
偶思游戲下清都難完今古輸贏局小展真靈位業圖  
修到神仙尙離別新秋瓜果拜黃姑

雲

翛然一片下仙闕去住無心鎮日閑驀地從龍作霖雨  
有時隨鶴返空山舊游畫棟珠簾外相望長松怪石閒  
記得金庭飛夢到梨花攔路不知還

霞

吹起龍綃挂夕煙軒軒還與赤城連樓頭夢緒長天外  
江上詩情落照邊畢竟文章饒綺麗縱成痼疾亦神仙

小祇陀盒詩鈔卷一

三

朝來數徧秋鴻影貫汝書空十萬牋

風

吹愁不斷奈愁何飛絮飛花掠夢過一筋尊鱸鄉味俊  
五湖鴻雁別情多蘭臺跌宕才人賦易水蕭寒壯士歌  
誰似茂陵誇絕調中流高唱壓汾河

雨

霧鬣風鬟下大荒凝龍鞭起夜茫茫平畦水活桑麻富  
貼樹雲低草木香幾日洗兵沿嶽靜六時耽讀短檠忙  
蕭蕭卻憶吳孃曲菰葉蘆花第五塘

露



珠塵吹落浩無聲，荷葉霏香夜氣清。  
別殿月寒仙掌迴，橫江秋老鶴身輕。  
染來水碧終成讖，洗出春紅舊擅名。  
二十四絃愁再鼓，楚天瑤瑟不勝情。

霜

伊人秋水望蒹葭，點鬢頻年感歲華。  
一片光明無礙月，十分孤冷不宜花。  
草枯榆塞鷹盤野，水縮楓隄雁踏沙。  
匣裏寒芒長劔在，夜闌相對影橫斜。

雪

唱韻聲兼折竹聲，白描高格句初成。  
雲昏虛閣花光曉，風重迴廊酒力輕。  
著地珊瑚瓊樹合，照人朗朗玉山明。  
不須便學袁安臥，愛向冰天躍馬行。

小祇陀盒詩鈔卷一

四

山中寄友人

絺衣生夏涼，昨夜過新雨。  
山中抱琴人，六月不知暑。  
劇藥雲洩辰，披蘿日亭午。  
微風振疏響，松格墮釵股。  
鹿飲溪泉甘，猿掛崖樹古。  
晝理參虎頭，詩心曳蠶緒。  
沉吟招隱篇，感慨蘭臺聚。  
蠟屐期未來，高齋冷談麈。

和東坡白水山佛跡巖五古原韻

蓬萊駕六鼇，巨靈斷其股。  
天風助掀簸，翼若鵬奮羽。  
羅山古濱海，光怪紛翳吐。  
山川合有時，勢遂造化補。  
巖崖互鉤聯，融洽交水乳。  
新居集百靈，觴詠矜藻斧。  
招邀到

龍象振錫自西土飛行本絕跡遺跡誌軒舞長髭與白  
足先後相接武遂使登臨人凜如履巨拇當年東坡翁  
入山臥秋雨浮蹤悟行腳蠟屐厭衙鼓紅蚪擘荔支白  
鶴開洞府潭深警饑蛟箐黑見啞虎躡鞢窮烟霏峻賞  
雜嘲侮至今千斛泉清響激飛弩迢迢七百年險韻敢  
輕賭作詩並呈佛鴻爪偶畱取自從嶺海歸巖岫莽無  
主何當踏雲來更憇羣玉圃

蠶豆

碧苗翠莢落麩桑葉陰森正熟蠶煮繭香濃春已半  
冶蛾花暗月當三種隨絕域歸楂遠句向朝天別集參

小祇陀盒詩鈔卷一

五

微雨吹絲青欲滴夕陽如夢綠初酣餉來蜀市兼吳市  
眠憶山南更水南亥舍新炊龍女獻丁盤舊薦馬頭譜  
霜時園客關心護風味吳孃舵尾談火活沙瓶供細漉  
露涼瓜塢記幽探清芬待共鶯桃滑小摘應過燕笋甘  
鹿眼棚低疑上箔狸奴簾捲佇攜籃評量食譜茶剛品  
商略行廚酒正耽老去誠齋還學圃加餐好與佛同龕  
蕭閑堂讀書用樊榭城西讀書雜興二首韻寄示

立齋三弟

解嘲誰計腹便便自愛巾瓶結淨緣人世無心同叔寶

故人耽讀有盈川

謂青泉

燭奴寂寂東西屋月子灣灣上



下弦憔悴天涯烏帽客晚蘆寒荻北來船

極天鴻雁愴離羣第五名曾汝社聞狂客長瑜原善謔  
酒人孫楚早能軍對牀舊約愁聽雨異地思親獨望雲  
難得讀書行萬里故山猿鶴莫移文

久不得立齋信却寄

幸免妻孥累高堂有老親艱難計門戶眠食念勞人盼  
汝長天信因之白髮新慈烏知返哺珍重客中身

屢游粵王山皆值飯僧題壁

磴道盤青石氣濃癡雲飛墮漢朝松秋山笑我成行腳  
又赴僧樓午飯鐘

小祇陀盒詩鈔卷一

六

歲暮感懷

被稜如鐵日高眠呵壁無靈懶問天客勸準衣收畫冊  
詩題祀竈續神絃疏狂游蹟呼山賊禁架塵心對水仙  
便擬浮名刪結習一龕彌勒證枯禪

耐抱冬心歷歲華紋窓清課未全差漸工作達新耽酒  
不善言情尙愛花似水年光消厯尾有人風雪客天涯

謂立齋季  
磨諸弟

寒梅一樹千迴繞誰寫孤山處士家

長至前四日夜寒甚有懷立齋弟計程可到程邁

與季磨弟相晤矣

薄酒不成醉天寒惻遠人乾坤羈旅賤骨肉異鄉親凍

研裁牋苦江梅入座新待尋姜被夢一爲叩南鱗  
樹缺郵亭補風巖驛馬瘖艱難汝行役溫飽我何心轉  
枕江濤厲聯牀夜蠟深天涯情話好望遠一沈吟  
歲月坐如此江湖思惘然世情增閱歷詩境拓山川  
柱遺封在珠厓舊郡連蠻谿多古意叢笑續成編

相逢行

東去伯勞西去燕風絮風花影中見人生相逢不相憐  
青天明月何時圓盈盈錦瑟排鈿柱萸蒲花小畱君住  
蝙蝠新融鏡裏斑鴛鴦未解壺中語花鬢一尺搖酒波  
欲醉未醉朱顏酡叢鈴碎珮丁年夢轉綠回黃子夜歌

小祇陀盒詩鈔卷一

七

歌長夢短春深淺鉛水銅龍催漏箭笛外新愁海水量  
樽前舊事浮雲變停罇忽思歸去來來時小桃花正開  
東風如虎不知惜昨朝紅雨今蒼苔唳鶯聲裏扁舟發  
蹤跡浮萍限南北團扇空酬白紵詞鳴珂卻避黃衫客  
刻意傷春春未知煙波重指後來期相逢他日曾相識  
定是桃花結子時

諫果

玉局新詞記摩圍舊句拈幾人慚白簡一樹落紅鹽勁  
節思攀檻高枝乍出檐眉噲徵士蹙頭訝弼公尖貯待  
攜蠻榼珍宜薦翠匳磊然增嫵媚持此代鍼砭味外酸



鹹得甘回齒頰恬素餐植愧伐倒啖蔗同甜披豁圭稜  
著封題牘背鈴彈文脩竹竦削藁野蒲銛雞舌含初似  
烏臺植更忼尙輸嘗膽苦未用轉喉嫌諤諤剛誰吐森  
森具爾瞻宿醒驚雪燥咳唾挾霜嚴艾憶三年覓茶懸  
八餅添椒難開口擬棗許赤心兼有客炎方去空懷雨  
露霑邪蒿排蠹本焚草效雞廉骨鯁嗟輕擲腸迴嘆久  
淹瘴鄉存碩果相對卷蘆簾

聞立齋弟東裝有期先寄此作

喜色到僮僕歸程猶水鄉故山秋樹暗斜日海帆張詩  
卷牛腰富風烟雁路長黃花兼紫蟹遲汝作重陽

余送別詞

小祇陀盒詩鈔卷一

八

有云黃花紫蟹待烟中鱗

蕭閑堂坐雨口號

隱隱雷車走阿香遙天一半尙斜陽茶聲滿樹拋書坐  
矮竹扶雲過短牆

穿龍岡

層岡洞其腹窺見隔江樹懸知江上人見我帆葉舉猿  
路通東西烏道互來去雲開月出脇霧豁天倚杵採藥  
人歸遲雙扉闢無主榜童鳧水倦坐臥沙上語爲言龍  
用壯霹靂雜風雨神力透山骨破若石飲羽之而今渺  
茫巖壑尙撐拒談龍類鑿空一笑吾不取

東官道中

書劍閑身在山川舉目非江流截漁斷天闊縱鷹圍估  
客長腰米防兵短後衣白鷗吾愧汝淡泊久忘機

博羅道中回望羅浮諸峯

舵尾一回眺煙深華首臺灘聲隨日落山勢挾城來翠

羽背人去梅花破臘開洞天前有約行役惜徘徊年時約載

珊上人同游不果

黃瀝

漠漠風搖岸沄沄浪拍天驚沙昏擁樹怪石怒迎船墟  
里依殘社牛羊散夕煙勞生亦何補歸買策谿田

小祇陀盒詩鈔卷一

九

舟中不寐口占

故國迢迢夢未成被池香落客愁生天寒自愛燒燈坐  
不為江流一夜聲

韓江客舍小除夕寄懷立齋

銅鼓聲中臘酒斟客冬思汝瘴江潯我今襍被來天末  
君轉懷人坐夜深接翼燕鴻分去住殘年山水倦登臨  
蠻鄉翦燭宵聽雨零落梅花一段心弟九月自陵陽歸里余於十月學俊

弟游韓江

除夕懷人絕句

少日詩名海外編松心樓閣老歸田夢中尙記尋詩去



春水桃花燕尾舩

張南山先生

奉太夫人樂有餘小園花竹賦閑居人間乞畫先生笑

自在奩中讀漢書

黎方流先生

涕淚生前酒一杯詩名京雜噪仙才平生老友多風義

麥飯年年上冢來

陳唐甫學博末二語謂劉蘭畹楊機山

化盡青燐草似烟傷心來泛海門船東風却憶江頭路

末座黃裳最少年

張茶農大令癸卯上己余邀先生修禊花田今六年矣

咫尺黃公舊酒壚木縣花落槍啼烏羨蘇詞卷飄零盡

尙有琵琶戀玉奴

黃蓉石比部

桑經酈註誤新刊燕樂源流補筆譚又是燈前聽細雨

小祇陀奩詩鈔卷一

十

把君詞卷憶江南

陳蘭甫廣文君著有燈前細雨詞憶江南館其齋勝也

許椽全家道氣濃

義山句 牛衣穩臥五更鐘十年骨肉論

交誼首憶瑯琊曼容

許青皋茂才

牢落乾坤倦眼開飛騰望汝出羣才誰憐廿載春明夢

尙着襴衫謁選來

蕭子喬大令

病骨支離太瘦生那堪重草瘞花銘公絃自理霜鴻怨

旁有方諸掣淚聽

李研卿孝廉君時悼亡

高臥元龍百尺樓此才終合有千秋愛騎欵段居鄉里

笑我扶風馬少游

柳岳雲茂才

醒亦能狂蓋次公解衣槃礴畫禪工憑闌莫更吹橫簫

雨雪關河有斷鴻

許駿生員外

蕭蕭瓶鉢歷江潭  
埽塔歸來靜上闕  
省識前身老居士  
潮音寒徹普陀山

遠承上人遠公喜參方至普陀灑然有所遇遂罷參歸佗城不復出

### 歲暮梅谿道中

筍盤深黑闕靈湫  
薄酒衝寒戀做裘  
殘臘計程緇歷尾  
曉天填墨寫蒼頭  
雲沈大壑撐孤塔  
木落陰厓出戍樓  
料理黃梅唵券在  
未應長負載花游

### 得月臺晚眺

無月亦登臺  
松風落日哀  
秋聲隨地起  
詩膽破空來  
人海填胸窄  
江山倦眼開  
叢祠餘斷碣  
草草拓莓苔

### 懷古

小祇陀龕詩鈔卷一

七

懷古三升淚  
江聲日夜潮  
晚涼蘇病骨  
百感入中宵  
流水成今昔  
才人自寂寥  
當筵鸚鵡舞  
慚愧阿龍超

### 春山行梅谿亂山中感賦

春山磔磔唬春禽  
陂塘拍拍春水生  
老榕垂髯菝芽短  
山水靜會詩人情  
籃輿一徑入深樹  
接葉卑枝礙行路  
直疑曳艇出交蘆  
船腹沙沙答鳴鶻  
坡陀亂石撐虎牙  
磊磊落落交谿訝  
茅龕覆在石深處  
閉門落盡棠梨花  
浪游苦憶鄉關遠  
策谿路逐花田轉  
社樹遙聯上下洞  
人家分住東西崦  
此時十丈開紅繖  
刺桐日曠東風顛



鐘魚早出煙雨寺簫鼓晚載珠江船有田不歸負江水  
却向流鶯訴憔悴鄉里空懷歎段游江湖滅盡相思字  
白塔紅亭一破顏眼中無限夕陽山浮雲淨埽天空闊  
誰起開籠放白鷗

三河

牌雙堠隻感塵勞春枕濤聲入夜高篷底疎燈篷背雨  
可憐無酒讀離騷

灘行有作

危灘淺瀨石潺湲鎮日舟移咫尺間莫與來船爭下水  
午風茶熟飽看山

小祇陀盒詩鈔卷一

三

贈趙英友

畫苑詩壇早策勳逃禪新愛證聲聞紅船載妓花圍月  
紫閣尋僧杖撥雲釀秫秘方朝捉醉彈蕉封事夜移文  
疎簾清簟涼如水棋局還教隔座分

無題和潘謙谷

棐几薰鑪水閣清焙茶天氣近清明花移南岸紅圍屋  
湖長東濠綠進城署小斜川蘇叔黨住長千里米嘉榮  
年時熟客經過慣青鳥憑呼舊姓名

夜行平遠道中書所見

江折路回環孤舟蒼莽間星光思替月水氣欲沈山漁

火知邨近荒燐上樹閑平生事幽討未惜鬢毛斑

故國

故國二千里斜陽相望愁客心懸去住鴻雁滿汀洲  
塔浮江出新墟戴日收煙塗渺何限迢遞極清秋

江樓小酌示俊民五弟

樓上相思詠白蘋樓前江水接天春一旗社雨開茶具  
三月桃花聚酒人殘壘近迷經戰地亂山慵似苦吟身  
干戈滿目漁家好擬借扁舟理釣綸

畫蘭梅州道中作

擁髻燈涼紫穗輕啼煙泣露太分明春風愁理唐昌夢

小祇陀盒詩鈔卷一

三

一夜江湖白髮生

龍川

十里龍川縣人家北崦多君王舊神武寂寞此山河  
亂石銜江渡橫風截雨過霸圖消未盡慷慨榜人歌

自龍川至河源水雲蒼鬱諸山一白戲吟絕句示

子俊弟

雲氣魚鱗積靄浮峯巒向背一時收天涯處處風波惡  
怪底青山總白頭

抵里後喜示諸弟

乍見欲何語相看各破顏生還今日幸  
黑夜渡大米灘中流舟破幾溺



歸夢昔時難花竹亦和氣詩書羅古歡陔南貧養好菜  
把送園官

小園行藥

行藥園林晚蕭然玩物華空壇墮鳥毳老樹熟縣花習

忍畱琴疣謀生辦畫叉杜門三日雨新綠滿窓紗

宋僧契嵩

詩習忍如幽草觀身類片雲

題鄜海雪袍琴小像

回飈激樹變徵音丹青突兀孤絃沈提攜便作蘇武節  
涕淚不灑田嘗琴顏雲如山日光紫長筇鳴吹不起  
角巾西第獨歸時臣似枯桐心半死當年別殿絃薰風

小祇陀盒詩鈔卷一

古

珠徽玉柱宮花紅人間不幸共流落天荒地老還相從  
男兒報國今已矣琴亦甘心殉知己隨身不愧玉帶生  
慟哭誰麾竹如意刀光照人冷於雪琴兮知臣臣力竭  
日影蒼黃叔夜心土花慘碧萋宏血虎門山外潮連天  
明福洞中生夕煙霓車蚪馭儻來往海濤彷彿鳴哀絃  
吁嗟乎臨淮靴刀段公笏豈獨詩豪追太白半生爨尾  
泣才人百尺龍門振風骨濁酒離騷弔鬼雄鬚眉還仰  
氣如虹更尋遺硯拓苕字夜泉颯颯吹天風

銘

天風吹夜泉海雪硯

案頭雜置諸詞集戲題四絕句

稼軒玉局氣拏雲字字華嚴剗外身夜半傳衣誰得髓

可憐人愛說蘇辛

稼軒東坡

老輩朱陳樹鼓旗家家傳寫徧烏絲誰知天授非人力

別有聰明飲水詞

竹垞迤陵容若

角巾西第思投老白髮微車耐退閑花外集兼樊榭集

一雙詞筆四明山

碧山樊榭

跌宕風懷老未剛狂名鵠起大江南若將書品參詞品

瘦硬通神郭十三

頻伽

病中呈張南山先生

絕學誰麟角浮生玩鼠肝小詩焚草易新論毀茶難夢

小祇陀金詩鈔卷一

五

惡迎巫祓心孤借藥安高堂霜鬢改一倍勸加餐

素嗜茗事

病中尙不能廢

寄都中諸故人

長天看盡倦雲還蘿薜深深靜掩關無事但過犀首飲  
有官常似馬曹閑秋槐暮雨三間屋水碓谿田一棱山  
漸識生涯耕讀好故人珍重鳳池班

前後唱和詩十五首并序

秋蕪如客候蟲應秋滅燭聽鴻散帙走蠹時則安仁閑  
居茂陵善病茗苦琴寂齋閑塵橫藥鑪偶曠毫穎斯託  
蘭甫學博青皋茂才愛而和之斜陽叩門舊雨接席折



麻枉贈書葉遂多因綜錄所著爲前後唱和詩十五首  
草堂人日之作東野雲龍之契俯仰光景流連主客藏  
之篋衍爲異日相思之資焉

寥落來鴻夜氣清草堂閑思與秋平病中閱世黃花換  
愁裏絃詩白髮生人事百年吹劍首關河千里厭笳聲  
與君四百峯頭約桐帽櫻鞋策杖行

蘭甫丈疊韻和示再呈長句

新詩有味露葵清方寸翛然五岳平自愛蓮花稱博士  
不煩歌板執門生陸澄嗜古將成癖侯喜攻詩近有聲  
何似田頭同叱犢一犁煙雨伴君行來詩有耦耕之約

小祇陀盒詩鈔卷一

再疊前韻和青泉并呈蘭甫丈

秘冊傳鈔到上清下簾蕭散愛君平松陰格破苔低補  
井檻泥窪菌寄生香界談經山芋火病中喜讀西方書雨燈搖  
夢水洪聲青泉有水洪老屋圖壯年一樣供虛擲卻羨攤書萬里

行蘭丈新自都下歸

屢奉蘭甫丈和章三疊前韻以報并酬青泉

到眼蓬萊易淺清且煩治具飲方平來詩云連日與南山師玉生廣文作

文字飲英雄各向尊前老芒角多從酒後生排日漁樵招

近局中宵庭樹作秋聲南朝法曲飄零盡乞鼓琵琶一

再行蘭丈精南宋燕樂及琵琶二十四調之說

青臬效金冬心體八疊前韻見示率此奉和

綠蘿結字署神清飲水讀經心太平丹砂未訪抱朴子  
瓜棗且乞安期生青落及榻就詩夢黃月當花聞雁聲  
酒闌何事忽綺語又爲楊枝歌短行

秋日雜詠效山谷體

冷押犀帷白晝眠秋陰如墨沍茶煙薰爐暝帽三年病  
不待新寒換越絛

過牆舊喜隣家樹分半清陰覆壞箔一夜攪林風似雨  
開門黃葉打頭來

朱墨燈籠坐夜闌小窓梧竹助蕭寒病中偶合髯蘇語  
案上楞嚴已不看

小祇陀盒詩鈔卷一

七

舌根不壞清淨相腹痛追念平生言不須鏡具走千里  
城外白楊多墓門

陰陰水閣長垣衣藕葉蕭疏芙蓉葉肥慵與白鷗爭坐席  
畫中新占釣漁磯

酒邊懷古三升淚燭後量愁一斛珠九月狼河尺書斷  
不分西風名鯉魚

禿柳鬚髻抑鮓天晚晴江市上炊煙漁人換酒踏歌去  
眼熟鷺鷥來守船

野狐拜月冠黃葉蒼狗搏雲變白衣人事萬端誰料得



五湖煙水鷓鴣飛

青臯以新詞枉訊近狀率成奉答

杜門病過荔支時塵事如雲了未知漱井午風涼破酒  
登樓山雨急催詩南皮舊會思公幹西掖雄文屬總持

聞李研卿館選

飽飢自憐空歲月江湖揮涕問瘡痍

彈琴十日興闌珊裏飢多君問病顏草澤無人知正禮  
里門終歲臥袁安雲難作雨休輕出花不知名轉耐看  
卻羨寓公池館好老荷疏柳足盤桓

小祇陀龕詩鈔卷一

小祇陀龕詩鈔卷一

六

小祇陀盒詩鈔卷二

番兩 沈世良 伯眉

齋前牡丹爲凍雨所阻慎句未花感賦

嶺南無雪花易栽牡丹卻自二吳來  
年年人日策谿路含苞拆暖當春開  
今年寒雨過燈節蘭粟欲綻仍表衰  
香瘢未許窺獺髓玉唾漸訝冰鱸顛  
標燈環炭中夜起破曉已繞花千回  
僵紅頰類蠶蝨蛹閨紫失望珠駢胎  
娉婷詎便嗟晚嫁儂蜂黠蛙紛驚猜  
豈無桃李慰岑寂麤俗畢竟非仙才  
風光誰與作判斷遲暮對此增餘哀  
安得羯鼓如春雷頑雲淨掃無纖埃  
錦帷日麗晴晝永霞光倒照春風杯  
天香國色一俯仰回黃轉綠皆興臺  
瓊鑪炙手自書葉吟詩火急花應哈

越數日花盛開復作長歌

雛晴滿院蝨作衙海日爛照紋窗紗  
披幃倦眼舒凍纈絳苞怒坼風前花  
胸春意槭脫落盡有若背癢麻姑爬  
手盆蹶覺霏霧滃腰鼓不用春雷搗  
黃雲承襪香袍履紫玉攪鏡鬢顏鴉  
同光共影星配月雙煙一氣脂融霞  
露房轉側看未足燕自起舞紅襟斜  
昨來吐語悔輕脫酒後芒角森槎牙  
尊前始念不及此意外倖獲容非奢  
歡娛旣過易蕭瑟翻祝緩緩開晴葩  
稠紅爛紫雖照耀



飄茵墮溷旋相加詎隨桃李競時節貴保秋實延春華  
扛壺醉語付醅酏回頭萬事紛河沙

春日雜詩

意行成獨往野趣愜孤悵  
害果後工釀銜花鹿護茸樵  
裝朝拾箭溪碓晚停春倚杖  
聽田水高人不可逢  
獵酒不成醉輶筒滿眼酤斜陽  
在喬木人語出深蘆晚  
市魚蝦賤低田雁鶩孤  
梨花吹作雪曾爲洗妝無

青谿三百曲曲種垂楊燕子經年別  
桃花一水香江湖春拍枕沙雨夜鳴榔  
欲訪煙中寺藤蘿暗上方

風急櫓枝柔花飛南渡頭離心與江水長日送行舟草

小祇陀盒詩鈔卷二

二

綠蠶天近沙黃蜨霧收笛聲高閣晚  
迸作酒人愁

黯澹天何醉年光鬢易絲柳絲吹  
又了梅子熟何時客感縈花鳥春風入  
鼓鼙塔雲低似墨莫怪踏青遲

贈青臯

捧海澆螢事總空山資未辦漸成翁  
琴無可典貧眞酷詩不求傳語益工  
十口累增鹽米外三春花落鼓鼙中  
憂時涕淚兼家國豈獨飄零歎轉蓬

用東坡岐亭韻作寄三弟

學佛支版門耽病餐藥汁君憐躑躅鱗吐沫兼煦濕  
一官相料理詭失復詭得雪嚴寒蟲號風倒退鷓急草堂

代檢校頻數到鵝鴨有時詩解頤宛若燈去羃邇來亦  
譚禪笑謂近朱赤中宵一團蒲守此鼻端白君才力扛  
鼎我懶緩着幘相逢燕市徒痛飲繼誦泣看書眼如電  
高詠唇未缺如何換骨丹反讓噉名客風雨對牀心三  
歎欒城集

獨漉篇

獨漉復獨漉今日山邱昨華屋一朝白髮染愁根萬古  
春風吹不綠阮公熟醉爲身謀荷插劉伶稱醉侯酒旗  
星沒謫仙死四明黃冠是知己詩魂酒魂招不來眼底  
紛紛盡餘子淵明投劾歸田園失計止酒拋清罇醉鄉  
小祇陀盒詩鈔卷二 三

寄遠承上人

行腳何妨學打包關春燕老尙尋巢謀生未辦千頭橘  
無用真同五石匏白社僧歸閑埽塔碧山人去自誅茅  
西枝擇地煩先導落葉疲驢路細鈔

癸丑感事十首

金隄穴蟻豈宜容南詔兵端坐養癰閫外風雲空駐節



草間狐兔久潛蹤  
廂軍致損烏重允  
祇廟新祠杜子恭  
自此煙塵橫桂管  
崗丁谿子荷戈從

長沙重鎮走風雷  
手挈河山出劫灰  
流涕春陵初退賊  
悲歌越石獨登臺  
飲江暫喜嚴圍解  
飛渡終憂鐵鎖開  
滿目瘡痍民力盡  
中田鴻雁待招徠

大雲山外火雲昏  
管鑰何人任北門  
早見孤城危黑子  
尙馳吉語料烏孫  
萬言未究平戎策  
一死何能報國恩  
猶勝檀公譏上著  
好憑哀些爲招魂

巴陵望極傳車馳  
拔劍難教治亂絲  
卷甲夏侯追敵日  
射罇王霸閉營時  
都無下意湘東奕  
倍覺傷心峴首碑

小祇陀金詩鈔卷二

四

坐擁上游空歲月  
黃金擲此總虛糜

百戰河山舊有名  
何難伏莽翦狐貍  
鞭刀陣上無堅志  
芒屨齋前早習行  
烽火卽今愁北固  
蟲沙自古怨南征  
吳頭楚尾軍書急  
慷慨何人繼請纓

芻粟東南困輓飛  
螻鴻西北懼軻餓  
倉頓塞蜚狐口  
鑲道難通鉅鹿圍  
蒜嶺旌旗愁外接  
瓜州燈火望中稀  
臨江疆弩思虞詡  
銜尾千艘達近畿

金陵明月廣陵花  
一夜吳霜點鬢華  
人散蕪城烽繞郭  
草荒螢苑柳搖鴉  
江流天塹愁豨突  
河朔山川慎犬牙  
可惜淮揚財賦地  
了無防衛槍搏沙

竹宮宵旰勵憂勤  
望掃櫬槍靜楚氛  
青海未收新戰骨  
藍田重起故將軍  
拜恩北近長安日  
行部西寥少室雲  
聞道漁陽飛騎合  
火牛須早策奇勳  
尺籍親軍隸羽林  
從龍世僕受恩深  
遺民并不畱三戶  
報國深知辦一心  
江繞南徐如走馬  
石填東海有窺禽  
覆舟山側千帆過  
誰燭先幾挽陸沉  
鐵馬金戈建業城  
牛頭雙闕舊陪京  
沿江遽撤西陵戍  
突騎虛張北府兵  
詎有機雲通將略  
更無廉藺共功名  
憂時事事堪危涕  
莫指疎狂怪賈生

雜感

小祇陀龕詩鈔卷二

五

牡丹產三吳  
移植珠海湄  
國色一俯仰  
羞落千蛾眉  
例不再歲花  
把玩纔旬時  
顏色有代謝  
反遭桃李嗤  
主人雅好事  
手獲加護持  
駿骨市千金  
終勝疲驢騎  
一月漸婀娜  
三月增歲蕤  
畱此一寸心  
將報千秋知  
浮根寄客土  
孤露終自危  
落葉糞本根  
飛花辭故枝  
葉落尙戀樹  
花飛無還期  
何必大海萍  
始爲長別離  
悲哉莊舄吟  
邈矣歸來詞

堂前兩珍樹  
蔭我蘭蕙叢  
炎天火雲熱  
雪月商飈衝  
寒暑遞遮拒  
交柯互峴嶂  
栽培一寸根  
擢秀蕭艾中  
一樹遽先折  
黃落隨西風  
所恃堂東樹  
獨幹撐鴻濛  
長條走



麗簌缺蓋張秋冬分支半庭綠補覆一畝宮風霜瘁經  
歷慘澹非舊容危枝綴蠹葉未老心已空一朝梁木壞  
朽骨摧蛇龍炎天火雲熱雪月商飈衝嗟哉蕙與蘭不  
如菲與葑

夏日約諸同人游荔灣中途風雨驟作獨與周伯  
琴易小舟改道支港往游潘園

荔灣小別今十年紅雲荔熟鳴新蟬討春不果策谿約  
買夏補放珠江船珠江潮來挾風雨一白江波濕江樹  
東船西舫斷行人浩蕩江鷗自來去同游盡止決獨行  
換舟並載鵝池生紅亭白塔落天牛淺水垂楊開晚晴

小祇陀盒詩鈔卷二

六

晚晴薄日烘雲影雨後園林倍清迥樹陰圓覆鹿牀頭  
花氣涼添鷺絲頂荷花梳掠風嫣然塘鏡暈波吹綠煙  
紅樓憶得最深處人意舊如花可憐論園往日移單舸  
口福髯蘇相印可劖朮新攜五尺鏡摩荔輕拋三百顆  
虹橋曲糸沿菰蒲人影渡水驚雙鳧款門春風解嘲客  
守舍便了嗔行酤行樂及時君記取何必香茅思結宇  
風月從來屬我曹湖山相對誰賓主世事悠悠安足論  
百年難得是閑身君不見吳頭楚尾軍書急六月火雲  
愁煞人

寄立齋弟

悲歌扣角夜漫漫牢落西華葛帳單  
苜蓿園荒天馬病  
關河霜苦春鴿寒  
客中休唾青城地  
塵外思簪碧玉冠  
可惜黃塵好  
身手寶刀輕易換  
漁竿

半段誰收爨下桐  
麻衣分手各西東  
屠龍枉學千金技  
射虎思彎兩石弓  
失路人情歌裏哭  
殊鄉骨肉亂離中  
何時早慰松楸願  
馬鬣經營負土同

讀南史擬古樂府十首

洗黃閣

不讀真隱傳不着鹿皮冠  
王家老狗放復還  
閣中老猴齊八關  
洗閣蒼皇率妻子  
難洗雌黃門戶恥  
不朱斯白又何人  
渾盡閣門井中水  
閣向東爲黃銅山  
鬼伎倆將無同  
西河之風退居賦  
耳學翻愧蒼頭公

背後節

背後節屠酷兒  
金布科法臣  
安知一人賜節  
萬人哭去  
作烏程枘上肉  
朝廷節重人命  
輕眼中見節  
不見人青  
衣匍匐染天血  
山陰獄囚何足恤  
節旄坐擁矜人  
豪如何亦畏周郎刀

悲郢城

金翅烏食龍子  
龍子食盡飛上天  
江南老公義師起  
郢州刺史廷尉孫  
圍城轉戰天地昏  
父作孝子兒忠臣  
十



行細書詔不至九死猶將府僚勵時論交推臧子源同  
心更有房僧寄吁嗟乎孝張里第家聲久詎止譚元工  
飲酒薄俗那知忠孝門風流獨慕靈和柳

廣絕交

到公抵几劉公樂交態炎涼描絕作眼前誰識彥昇兒  
葛帔天寒行索索男兒志氣龍難馴豈望公等哀王孫  
任公宏獎滿天下當時亦失裴子野不栽桃李栽蒺藜  
千金可惜酬奴價雀環蛇珠解報恩吁嗟蛇雀原非人

着黃襪

豬龍生子成乖龍豢龍者誰爲白虹白虹貫日老不死

小祇陀盒詩鈔卷二

八

手縛乖龍割龍耳黃襪雖故君恩新龍顏早識蕭領軍  
青衣老兵裹龍首虹兮別去攀龍鱗不向龍宮乳龍子  
却作齊臺老官伎琵琶終曲氣如虹齒冷罇前沈文季

誘賊講

用佛媚賊賊不嗔呼賊作佛佛不聞袈裟作袴赴賊軍  
脩羅戈幢布山海賊幸點頭官奏凱是應得封何論罪  
豫章造廬嗟望塵竟陵入座還角巾平生出處盡如此  
何怪人思臣老子賊中握塵譚空王城中出盪呼蔣王

二義士

奉化門梟獍沸誰其死節袁太尉石頭城碧血枯誰其

死節哀司徒家門忠烈炳天地豈屑師涓來抱器不謝  
罪不請降覆書拒境眞堂堂昂昂之駒日千里驂駒更  
有馬仙婢故人可斬身可死大節煌煌照青史勿笑韓  
非附老子吁嗟乎二義士

返惹肆

百萬買宅千萬買隣奇聲大類稱貴人封侯有骨致身  
早自許功名非草草君不見賣珠兒主人翁屠酷商販  
司徒公眼前肉食多市傭又不見金錢一千得刺史隔  
牆訂交從此始何獨求官怪兄子且莫驅車返惹肆

續命田

小祇陀盒詩鈔卷二

九

黃標紫標膀滿屋同產未能分半菽千金萬金壽要津  
一飯未曾畱故人饑民日日道旁死鬼氣如烟黯都市  
何來歡笑騰窮簷續命幸有劉家田頃刻人鬼判眼前  
黃父失肉心瞿然多牛老翁心感感怪汝揮金同瓦礫  
乃公今年方閉糴

黑蜚賦

古今狐貉同一邱蟻穴或夢封王侯白鳥得食青蠅愁  
醢雞甕天隘九州織簾先生齒獨冷黑蜚遽遽樂清靜  
三生脈望字爲糧一月萊蕪塵滿甌莊周夢蝶子雲草  
元知白守黑全其天安用五色馱神仙老眼鈔書猶萬



紙羔雁成羣徵不起獸檻魚懸知免矣

哭杜洛川廣文

游

青箔及榻塵封塵十日登樓九風雨炙雞絮酒哭君時  
日暮天陰鬼車語謁君昔恨摳衣遲清譚佛屋樹影移  
鬢毵換竹人乞畫缸面欸客僧求詩畫梅千樹詩千軸  
散髮斜簪厭拘束少年裘馬杜陵花晚歲風塵燕將錄  
櫬槍吳楚兵氛纏三年蒿目心煩煎甘泉捷書久未到  
禪榻鬢絲愁不眠昨聞君去尋盤谷避地先期營水竹  
蹠未思畊下澗田移家別賃西枝屋我時聞語心隱憂  
憂君貧病今白頭西河疊抱垂老痛漆室豈任無窮愁

小祇陀盒詩鈔卷二

十

訃書一紙蕭齋裏流涕果然君死矣崔駟矢志損天年  
臣偃憂時歿猶視一官註選空蹉跎問舍求田意若何  
黃金手散閒身在白髮心傷暗淚多烽煙遼闊三千里  
肉食何人報知已儒冠潦倒不忘君不愧少陵老孫子  
過青皋南園寓齋感贈

憶昔別君游揭陽先期就君占行藏君時南園校經史  
滿簾蜂聲白日長敗荷疎柳作秋意油燈不繼月入房  
我將首塗忽改轍君亦寄研隨山郎嶺梅漸花月在亥  
始決東去登舩腥君心惻然念遠客攜手慘戚譟河梁  
重關預恐魚鱗下襜被先借南園旁夜譚燈火照雙影

苦語重複啼寒螿水蒨窓下助蕭瑟僮僕觸壁臥且僵  
宵闌送我出深巷犬吠如豹天有霜疎星照水遞明滅  
缺月掛樹隨低昂關河蒼莽作此別落寞不減成都揚  
青雲橋上共長揖別淚灑向西風涼揭陽地僻斷賓客  
况復開徑思求羊翼鱗往返念儔侶停雲望遠孤琴張  
明年旅病辨歸棹秋駕兼逐槐花忙佗城見君一握手  
喜氣早透眉端黃豈知勞瘁增痼疾出入生死形頽唐  
朝餐藥汁臥虛館夜夢邱墓行北邙三年骨立支兩版  
親友闊絕參與商君時裹飯屢枉顧外雖寬譬神內傷  
萊蕪塵甑秘不語恐我扼腕增旁皇平生交誼等骨肉

小祇陀盒詩鈔卷二

七

於此見子真肝腸客秋力疾赴場屋親老敢作冥鴻翔  
白袍乍脫慟風木血淚仰視天茫茫人生到此萬念絕  
厄閨那暇悲黃楊榻來瑣細任鹽米研匣蠹網書堆牀  
輸君擺脫堅道力貧已到骨心吉祥松廬詩伯老愛士  
海內俯首尊靈光抗風軒西十笏地萬卷借署曹家倉  
粥魚齋鼓依白社錦暉玉軸傳青箱分君牛榻作寓燕  
終日闔戶同顛當吟詩呈佛代清供飲水嗅帖羅古香  
嫩晴來訪更蠟屐老柳肅客仍雁行庭前斷碣辨苔字  
屋後淺水聞漁榔浩然懷古發深歎脫口恐怪狂生狂  
潢池弄兵已三載民力瘁止疲輸將干戈近漸半天地



百口燕雀危處堂讀書貧賤未足恥孤露詎復思騰驥  
十雙儻得置田券五萬不再營滄浪瓜疇芋區足生理  
萊妻霸子安畊桑種樹偶師橐駝法懸壺網校龍宮方  
君如卜隣踐夙約便築精舍同徜徉黃雞白酒招近局  
張南周北欣連牆浮雲萬事不挂眼烽火不到無功鄉  
但虞骨相素屯滯畫餅未必充飢糧五年所厯已難料  
後事反復誰能量龕中彌勒亦齒冷米汁且覆懷中觴  
疾書拉雜杼胸臆但願白首無相忘

秋感

搖落鄉關賦北征幾時罇酒話昇平星搖大角纏兵氣

小祇陀盒詩鈔卷二

三

樹激悲風叫弩聲今古橫胸供灑涕干戈何地置浮生  
黃皮袴褶公然好鞞馬思隨驃騎營

平泉花木媚懸車曾見先臣侍板輿亂後田園思杜曲

望中山色尙秦餘蹉跎賀監還鄉志慷慨臨川誓墓書

長日越吟增悵惘丹楓黃菊愛吾廬

方伯公歸老後曾  
王父築老圃爲板

輿游醮之所正對  
秦望山今尙存

少年風力抗鵬翎中歲巖扉註鶴經浮白愛吟枯樹賦

駢紅狂草瘞花銘馬卿多病稱詞客臣朔長饑是歲星

值得歌堂秋拍碎本來身世太飄零

散髮吟商意惘然不妨安石柘枝顛夢拋楊柳仍千尺

人老芙蓉又十年  
碁屋燈昏蟲絮夜  
玉河霜緊雁橫天  
陂塘八月蒨花雨  
賒與鷓鴣取次眠

侍坐曾容點瑟狂  
移居還傍鄭公鄉  
勞生託命鑿黃獨  
刻意悲秋種白楊  
雲熟稻畦爭雁鶩  
煙深苔巷下牛羊  
篋中詩語圓今日  
眞許彭宣到後堂

方流師近許卜隣

霜寒荆樹花飛急  
飛作楊花滿客途  
踏葉關山疲瘦馬  
毀巢風雨泣慈烏  
屠酤混跡悲歌易  
燈火涼秋舊夢孤  
南市津頭營釣具  
遲君同飯四顛鱸

立齋弟久客韓江

朝雲塔脚峭帆收  
會戀豐湖鎮日留  
風景不殊鷗對語  
蘇程之後我來游  
低嵐閣雨紅亭晚  
涼葑吹波白袷秋

小祇陀盒詩鈔卷二

三

回首薜蘿常在眼  
意思長笛弄扁舟

詎用名空冀  
北羣林泉祇愿息  
勞筋盈虧不礙當頭月  
恩怨全消過眼雲  
我亦閒居愛重九  
人言種竹要三分  
夜窗一卷秋聲賦  
讀向燈前不忍聞

戲贈青臬

嗟君塵甑今十年  
齋廚卓午無爨烟  
撐腸空飽蒼頡字  
餉客絕少王宏錢  
瘦羊博士更可憐  
持籌握算心悄然  
萬金顛倒擲虛牝  
三載縛束畊石田  
飄茵墮溷偶相值  
如風憐目夔憐蛇  
文園賣賦苦不數  
儉牛牆東亦不惡  
關中自鬻王猛  
畚市上去賣韓康  
藥古人游戲何事無



今我胡爲獨不樂君本神仙許玉斧我亦清狂沈昭略  
蟠桃未熟三千秋汗漫且作人間游債臺便足供作達  
娛老豈復營糟邱寒山拾得兩窮士來牛去馬千王侯  
今日斷腸草昨日芙蓉花東陵去種青門瓜畫樓曲柄  
彈箏琶空堂過眼棲饑鴉掉頭萬事俱搏沙區區窮達  
勿芥蒂變滅任化風中霞

寄潘子春內兄

聞道病來新止酒可能拋卷暫尋春一燈夢到蓮花地  
水闊雲寒不見人

秋夜讀山谷次蘇子瞻和李太白潯陽紫極宮感

小祇陀龕詩鈔卷二

齒

秋詩韻追懷太白子瞻之作慨然續和追懷山  
谷

我愛涪翁詩胸次貯全竹僊人餉朝餐松花拾盈掬稍  
勝老拾遺忍饑鬪黃獨前身金粟影世味空桑宿謫居  
意灑然安用詹尹卜秋風落葉裏疑有古魂復舊夢如  
殘棋明滅一燈覆散帙悵懷人茶聲鼎中熟

用山谷和劉景文韻贈柳岳雲

海鷗本忘機野老自爭席閉門三日閑有若返趙壁秋  
風掃酷暑缺月掛烟夕抱瓜呼小童却刺謝殘客書生  
例強項卽事多感激終然吳市簫遠勝東郭瑟種竹千

戶侯擁卷百城敵清齋摘露葵貝葉繙梵冊先生管樂  
徒高臥偶蹋壁洞微貫虱心赴義勇烏獲蕭然龍鳳姿  
豈羨雞鷺食餘事愛文史驅染徧煙墨我材木樗散巧  
匠資損益桓譚識子雲卻自矜目力奈何噉名輩竊竊  
議三北高荷老未枯花底堪岸幘會當招鷺鷥相就共  
浮白

得岳雲和作再疊前韻

望蔡見羊欣易衣更改席誰歟寶破釜輕碎千金璧知  
已自古難非可期旦夕君看虞功曹青蠅作弔客至今  
訶子林風雨夜淒激正平辱鼓吏哀過素女瑟名高楊

小祇陀會詩鈔卷二

五

孔間氣與袁曹敵蹉跎鸚鵡賦睥睨兔園冊可憐虎陷  
機永愧龍破壁况我麋鹿姿敢望鬼章獲君才足靖亂  
扼腕鄙肉食憑誰假斧柯決計屏鉛墨樓船下建康羽  
檄備梁益貂蟬出兜鍪詎藉子公力歸來共里閭張南  
與周北暇時倘顧我莫怪緩着幘隔牆過濁醪畱君飯  
三白

讀史三疊前韻

嘗怪馬扶風盧鄭侍經席晚撰西第頌頓毀連城壁阮  
公曠士懷把酒永朝夕醉草勸進牋遂作朱邸客人生  
電露裏風水偶相激歡娛一彈指既過亦蕭瑟奈何戰



紛華輕身餌強敵顧廚濫標榜虛聲盜史冊卓哉申屠  
端獨立千仞壁冥鴻一萬里弋者何所獲饑彪怒飽肉  
餓麟困無食千秋論定後赤黑辨朱墨瑣瑣嘲小儒買  
菜慣求益詩書炯前鑒出處徵道力世無九方歎良馬  
老冀北願安蘇門嘯不假侍中幘脫身黨錮中山人獨  
衣白

用岳雲韻

高文典冊讓相如袖裏新攜汜勝書僅博山君營一飽  
可憐伎倆誤黔驢

喚取蕭公作步兵一時狂態想書生豚蹄勺酒田間祝

小祇陀盒詩鈔卷二

去

旁有淳于笑絕纒

過伍子昇園中卽事

看客鷓鴣眼尙生背人飛過雪衣輕涼蟬萬翼喧如雨  
水閣斜陽正晚晴

竹所彎環踏古苔老荷梳掠入秋開故人近住東頭屋

不見雙藤撥葉來

謂史謙齋茂才

佳兒置膝王文度愛客前身顧阿瑛值得詩人許丁卯

五湖煙水訂鷗盟

訶林謁虞仲翔祠感賦

曲鍼腐芥語絕倫綺歲氣骨高嶙峋虎兒初生已食犢

龍性至老猶難馴先朝恩禮絕行輩草昧締造資經綸  
關中根本託蕭相章貢伏軾收奇勳鳳麟攀附足知已  
弔容豈至煩青蠅惜哉骨骸遭屏斥大度空說髯將軍  
江東坐藉父兄業受諫正賴芻蕘詢善旌謗鼓苦不足  
况復醉劍仇批麟老瞞往事詎足效家寶幾喪璠璣珍  
規模開國已狹小安怪降表甘稱臣惟君忠介耿星日  
九死遠謫蠻江濱當時卜居偶築室想見祀竈延比隣  
閉門老樹十圍大箸易舊夢三爻吞中原干戈苦割據  
故里蕭索游青燐才人幾輩作枯骨瘴海一老雷遺民  
盈虛消息試探索天心未必忘斯人卽今遺構依梵宇

小祇陀龕詩鈔卷二

七

龍象呵護椽題新黃蕉紫荔薦伏臘粥魚齋鼓喧昏晨  
我來喜值秋暑退枕椰過雨青輪困摳衣謁拜增慨歎  
兵馬未洗多風塵官軍急望吳楚捷烽火遠徹燕齊昏  
嶺南地僻漢一郡幕燕日日憂榆枌文章經濟敢輕擬  
儻較骨相尤艱屯鄜家池水近咫尺碧血透滲松烟痕  
雲龍上下許追逐願執鞭弭隨輿輪

與同人游白雲山午飯倚雲樓

出郭曉星碎到山初日涼茅荒蝙蝠竄樹老龍蛇僵逆  
風過林曲潑袂松花黃狼藉嗅金粉人間無此香飛樓  
結木未有若蠟附房雲氣不一族分踞各有疆須臾眾



峯沒一白交混茫惜哉蔽遠目不得窮扶桑安期去已  
久瓜棗何由嘗山僧具伊蒲米汁姑盡觴

由濂泉坑步至鄭仙寺

百步聞水聲清響散琴筑毳毼巖際花倒飲潭上綠磴  
折苔屢盤峯迴路彌曲欵扉侍童清夾陞仙吏肅岡巒  
俯向背參錯爭起伏峭碧千仞鑿危青一峯覆詩心墮  
蒼莽如月不可捉松火發玉泉坐待茶鼎熟

過能仁寺訪慧上人不過

梵放出深林卓午客初至意行忘遠近踏葉雨聲脆土  
僧出未還佛火半龕閉坐久聞鳥喧簷空落山翠萬花  
開祖庭一鶴夢初地城中苦秋熱暑觸不可避抽筇倘  
歸來踟蹰聽松吹

歸途覓鶴舒臺故陞不得小憩蒲澗寺觀東坡詩

碣

名山與福地主者皆神仙君看鶴舒臺淪沒今幾年成  
壞自常理久住終無緣回頭笑祖龍駐世期彭篋菖蒲  
不再花澗底餘流泉水亦清淺一半成墓田何如老  
瞿曇解脫空諸天桃竹贈過客詩語東坡傳山中乏好  
事掌故誰重編僧雛慣避人日落猶高眠

小詩乞陳蘭甫丈爲作楞華室榜字

兩架三間白樂天山資未辦草堂錢銀鉤乞署榜華室  
我堂頭粥飯緣

題蘭甫丈憶江南館詞集後

新廚早啖防風粥觸手新詞發妙香我愧吳均耽說餅  
不曾真飽太官羊

小祇陀盒詩鈔卷二

男澤  
堂全謹校

小祇陀盒詩鈔卷二

九

